


**02 FEBROARY 2017**



***Ankehitriny, ry Tompo, vao alefanao am-piadanana araka ny teninao ny mpanomponao,fa ny masoko nahita ny famonjena avy aminao***

Ry Kristianina havana, izao 02 febroary izao no ankalazantsika ny nanolorana ny Tompo tao an-tempoly izay antsointsika hoe fetin'ny Jiro masina. Fanamasinana ny jiro masina, izay mahatonga atsika rehefa manomboka ny lamesa manao ny fitondrasana ny jiro rehetra ao amin'ny Eglizy. Nefa tsara tadidy ary efa naverina matetika amintsika fa tsy manao "théâtre" na fampisehoana isika raha manao izany fihetsika izany fa litorjia izany hoe asan'Andriamanitra ka mivelona an'izay ankalazaintsika izay isika. Tsy hoe mahatsiaro fotsiny fa noho ny asan'ny FANAHY MASINA ao amintsika dia sady mankalaza no mahatsiaro isika ka mivelona an'izay ankalazaina.

Androany dia mahatsiaro ny nanolorana ny Tompo tao an-tempoly isika, raha ny marina kokoa dia izy no nanolotra ny tenany, izy ilay fahazavana ka izay no mahatonga atsika androany maneho an'izany amin'ny alalan'ny fitondrasana ny jiro ka miditra ao an-deglizy.

Isika avy nandray ny fahazavan'i Kristy dia zary fahazavana eo amin'ny mpiara-belona ka hahatonga atsika ihany koa hanilo ny hafa tahaka an'i Kristy izay natolotra tao an-tempoly.

Io no mahatonga an'i Simeona milaza ao amin'ny evanjely fa izy Kristy no fahazavana ka izay mandray azy dia lasa fahazavana tokoa fa fanafintohinana kosa ho an'izay tsy mandray azy.

**Vakiteny I : Malakia 3,1-4.**  
**Tononkira : Sal. 24**  
**Evanjely : Lioka 2,22-40.**

Ambara amintsika ny tena dikan'izao zavatra izao, rehefa nahita maso an'i Jesoa sy nitrotro azy teo antanany i Simeona dia nilaza fa io ilay fahazavana hanilo ny olona rehetra sady voninahitr'Andriamanitra : *"Ary nitso-drano azy ireo i Simeôna, ka nilaza tamin'i Maria Renin'ny Zaza hoe: "Indro ity Zaza ity no voatendry ho fandavoana sy ho fananganana ny maro amin'i Israely ary ho famantarana hotoherina, — ary ny fanahinao aza hotanterahin-tsabatra — mba hiseho ny hevitra ny fo maro"*

Izany no ankalazaintsika androany 02 febroary dia i Jesoa manilo an'izao rehetra izao.

Fampianarana lehibe ho antsika ihany koa dia ny fahafahan'i Simeona sy Anina afaka nandray ny fahazavana satria olona mivavaka izy ireo, olona miray fo tanteraka amin'Andriamanitra, tao amin'izy ireo ny Fanahy Masina ka afaka nandray an'i Jesoa ary dia nahita ny fahazavana.

Ry Kristianina havana, tsy afaka handray ilay fahazavana isika raha tsy ny fontsika no miova, raha mbola "encombré" araka ny averimberintsika matetika. Raha mbola ao anatin'ny fontsika ao ny fialonana, ny adiady, ny fitiavan-tena, ao anatintsika ao ny harena tsy izy satria ny harena tokana dia Andriamanitra, feno ny fontsika ka tsy misy toerana ho an'i Jesoa intsony, maizina isika ka tsy afaka handray azy. Amin'izao fankalazana an'i Jesoa natolotra ao an-tempoly, ny marina kokoa dia izy nanolotra ny tenany amin'ny maha- Andriamanitra azy mba ho fahazavana ho antsika olombelona. I Jesoa dia olombelona feno tanteraka tokoa noho izy nanaiky ireo lalàna mametra azy amy maha-olombelona azy satria araky ny lalan'i Moizy dia tsy maintsy atolotra ao an-tempoly ny zaza voalohany rehetra, nanaiky izany izy dia manambara fa olombelona izy ary ny maha-olombelona azy no nentiny namonjeny atsika. Nanaiky ho fahotana izy izay tsy mpanota mba hanafaka atsika amin'ny fahotana ka izany no fahazavana. Raha mandray azy isika dia afaka handeha amin'ny fahazavana. Izany no ambaran'ny vakiteny voalohany ao amin'ny bokin'i Malakia mpaminany : *"tonga ao an-tempoly ny Tompo tadiavinareo"*. Tanteraka ao amin'ny fiainantsika izany hafatra izany satria isika no tempolin'Andriamanitra, isika no Eglizy. Raha isika ary no mahatsapa fa Eglizy tokoa ka afaka mitondra an'ilay fahazavana eo amin'ny manodidina atsika izay ambaran'ny mpanoratra ny taratasy ho an'ny Hebrio : *"tsy maintsy mitovy amin'ny rahalahiny amin'ny zavatra rehetra izy, hamonjeny ireo rahalahiny"*, nanaiky ho tonga olombelona i Jesoa mba ho fanilo sy fahazavana ary izany no fanavotana ho antsika. Raha miditra amin'ny fiainantsika tokoa i Jesoa dia hanavao ny fiainantsika izy ka hanavao ny fianakaviansika, ny fiaraha-monintsika, ny tontolo manodidina atsika.

Araka ny fantantsika dia nofidin'i papa Md Paoly 2 ho andron' ny voatokana androany, nofidiny izany mba hahafahana mivavaka ho azy ireo manokana sy handinihian'izy ireo koa fa famantarana fitiavana izy ireo satria io fitiavana io no tena fahazavana. Matoa i Jesoa manolo-tena dia satria ao anatin'ny fitiavana izay ary dia manolotra ny tenany koa ny voatokana natokana ho an'Andriamanitra tahaka an'i Jesoa izy ireo mba ho famantarana ny fahazavana amin'ny alalan'ny fiainany manontolo fa nahafoy ho an'Andriamanitra izy ka mahafoy, manompo ny olombelona.

Ry Kristianina havana amin'izao taonan'ny finoana izao, taona andalinantsika an'i Jesoa ilay mpiara-belona amintsika, "Jésus contemporain", manolo-tena sy miara-dàlana amintsika izy ka hibanjinantsika sy hivelomantsika ary hianarantsika ny fiainany mba ho fianana kristianina tokoa ny hiainantsika satria isika Kristianina dia avy amin'i Kristy, amin'izay koa isika handray azy tahaka an'i Simeona sy Anina. Mandray azy no ataontsika amin'ny Eokaristia, izy no fahazavana, ka isika koa manolotra ny tenantsika, manome ny tenantsika, izay midika fa mahafoy sy manompo an'ireo manodidina atsika, izany ny fiainany voatokana.

Ry Kristianina havana, aoka mba hivelona bebe kokoa amin'izao andro lehibe izao isika, andron'ny jiro masina, antoky ny fahazavana dia i Kristy ka isika no jiro masina eo amin'ny mpiara-belona amintsika, hitondra ny fahamarinan'i Kristy isika, hampanjaka ny rariny sy hitsin'i Kristy, hivelona ny fitiavan'i kristy ka ho mpampihavana isika amin'ny ataontsika rehetra, ary izany no fanohizana ny taona masina ny famindrampo ary indrindra mba ho fahazavana isika dia aoka hamboly hazo sy hiaro ny tontolo manodidina atsika mba hanambarana fa famantaram-pamonjana tokoa ny fiainantsika manontolo.

Mompera Arseveka Mgr Benjamin Ramaroson